

Adissiatz las amigas e los amics,

Diluns sèm tornats a l'**escòla**. Ara lo matin quand arribam, jogam a un jòc de construccion per fabricar d'avions, d'**ostals**, de batèls. Avèm tanben de **copacaps**, una cosina e un garatge per las pichonas **veituras**, de cartas per far a la batalha e de **gredons** de color per dessénhar. Quand anam al canton, la mèstra nos conta d'istòrias. En seguida, cantam e aprenèm de comptinas. Aprèp los **pichons** van a las taulas per dessénhar amb de **feutres**. De còps que i a, fan de **pintura** tanben. Mas abans cal cargar un davantal ! Los mejans e los bèls fan de matematicas. Comptan los **cubes** : un, dos, tres, quatre, cinc, sièis, sèt, uèch, nòu, dètz ! Puei escrivon la data e de frases dins lo quasèrn amb un gredon de papièr.

Pendent la recreacion, jogam al **balon** e fasèm de **bicicleta**. Coma es la davalada lo **vent** e la **pluèja** fan tombar las **fuèlhas** dels arbres **grands** de la cort. Aprèp la recreacion, anam dins la sala de motricitat per far de jòcs, còrrer, sautar, escalar o **èsser en equilibri**. Dins la classa legissèm de **libres**. N'i a un amb de bèstias coma a la bòrda de Martin que visitèrem amassa : una pola, un **tesson**, un colomb, un ase, una craba, un moton. È sabètz tanben que dins la nòstra classa, i a un aquarium amb un **peis** ? Lo noirissèm cadun son torn. Mas **manja** pas de pan ni de **chocolat**, pr'aquò es plan bon ! Avèm tanben un **aucelon** dins la cort de recreacion. A la fin de la jornada, abans de tornar a l'ostal, la mèstra nos fa escotar de musica. Nos agrada fòrça ! È ara, que fasètz vosautres ? Nos triga de vos tornar veire !

Poton

La classa de pichona, mejana e granda seccion